

## **32-боб. Қариндошлик алоқасини узганнинг гуноҳи**



12:10 / 21.03.2019 4409

64. Жубайр ибн Мутъимдан ривоят қилинади:

**«Расулуллоҳ соллаллоҳу алайҳи васалламнинг «Қариндошлик алоқасини узган одам жаннатга кирмайди», деганларини эшиғтанман».**

Шарҳ: Силаи раҳмни узиш ана шундай катта гуноҳдир, инсоннинг жаннатга кирмай қолишига сабаб бўладиган гуноҳ ишлардандир. Аллоҳ таоло бундан йўз паноҳида асрасин.

65. Абу Ҳурайрадан ривоят қилинади:

**«Расулуллоҳ соллаллоҳу алайҳи васаллам шундай дедилар:**

**«Раҳм Роҳмандан олинган. У: «Эй Роббим! Менга зулм қилинди. Эй Роббим! Мени узишди. Эй Роббим! Мени..., мени...» дейди. «Сени узганни узишимдан, сени боғлаганни боғлашимдан рози бўласанми?» дейди У Зот».**

Шарҳ: Демак, бу дунёда қариндошлик алоқасини узганлардан қиёмат куни Аллоҳ таоло алоқани узар экан, силаи раҳм қилганларга эса раҳм қилар экан. Бу ҳам силаи раҳмни узиш оғир мусибат эканини, бундай қилганлар қиёматда жуда оғир ҳолатда бўлишини, Аллоҳ таолонинг раҳматидан маҳрум бўлишини билдиради.

**66. Саъид ибн Самъондан ривоят қилинади:**

**«Абу Ҳурайранинг ёш болалар ва эсипастлар ишбоши бўлиб қолишидан паноҳ сўраганини эшитдим».**

**Саъид ибн Самъон айтади:**

**«Менга Ибн Ҳасана Жуҳаний хабар берди. У Абу Ҳурайрага:**

**«Бунинг белгиси нима?» деган экан.**

**«Қариндошлиқ алоқасининг узилиши, иғвогарга итоат этилиши ва муршидга осийлик қилиниши», дебди у».**

*Шарҳ:* Яъни «Ўшандаги қариндошлиқ алоқаларининг узилиши бошланади», деган эканлар.

Ёшлар қариндошларнинг қадрини билмайди, ҳовлиқиб, ҳар тарафга югуради, қариндош-уруғни эсдан чиқаради. Иғвогарга итоат қилинади. Иғвогарларнинг иши юришиб кетади, ёш болани ишонтириб, ишни ўз фойдасига буради.

Муршид одам, яхши одам, тӯғри, мукаммал одамнинг айтганини ҳеч ким қилмай қўяди. Унга исён этилади. Ана шулар одамларнинг бошига тушган кулфатнинг аломатлари экан.

Қаерда қариндошлиқ алоқалари узилса, иғвогарга итоат, муршидга исён қилинса, бундай жамиятда яхшилик бўлмас экан. Бу ерда ҳам қариндошлиқ алоқаларининг узилиши биринчи ўринда зикр қилинняпти. Бундан жуда эҳтиёт бўлиш кераклиги таъкидланмоқда.

**Ушбу ривоятдан олинадиган фойдалар:**

1. Ёш болалар ва эси пастларнинг ишбоши бўлиши жамият учун яхши эмаслиги.
2. Қариндошлиқ алоқаларининг узилиши жамият учун ёмонлик аломати экани.
3. Иғвогарга итоат этилиши жамият учун ёмонлик аломати экани.
4. Муршид – яхшиликка бошловчига осийлик жамият учун ёмонлик аломати экани.

**«Одоблар хазинаси» китобидан**